

Igoro ya 'N'g'anaki...

Barry, A. L.. - WHAT ABOUT? LIVING TOGETHER WITHOUT MARRIAGE - Ekegusii

Okomenya Amo Motaranywoomana

Omonyagitaari A. L. Barry
Omotaang'ani
Ekanisa y'Ekeluteeri y'Esinooti ya Missouri



Igoro ya 'Ng'anaki...Okomenya Amo Motaranywoomana?

Okomeentekana 'nkoreo kw'abamura n'abaiseke bagochoora komenya amo buna omosaacha n'omokuungu bataranywoomana. Amariiko aya nairanerie amaboorio gete ayio akoboorigwa igoro y'okomenya amo motaranywoomana.

Enywoomo Ninki?

Riing'ana ria Nyasae nigo rigotwoorokereria 'ng'a enywoomo nokomeenya aamo goika ogokwa, okobwaatana kwa beene gati y'omosaacha oyoomo n'omokuungu oyoomo, buna omoonto na mokaaye. Enywoomo n'enseemo y'obotoongi bwa Nyasae. Aseigo, nigo togosooma Riing'ana ria Nyasae, nakwo ogoteeba, Ebibilia: "Ase ayio, omo[o]nto na[a]tige ise na ng'ina, abwa[a]tane na moka[a]ye, n[']abwo babere [']nababe omobere oyo[o]mo" (Omoch. 24 gweekania na; Mat. 19: 56; Ef. 5:31).

Asaande nigo togosooma 'ng'a, "Kore[e]nde ase enge[e]ncho y'amateemwa ay'ogokora obotomani[,] kera omosa[a]cha abe na moka[a]ye omonyene, na kera omoku[u]ngu abe n[']omosa[a]cha oye omonyene" (1 Kor. 7:2), naende 'ng'a, "Okonywo[o]mana gosikwe n[']aba[a]nto bo[o]nsi, na ebiraarero bibe bitari n[']obosooku, [']naki abanyaka n[']abatamani Nyasae nabaga[a]mbie eki[i]na" (Ebir. 13:4). Enywoomo nogosesenigwa kw'erigori rinene kegima, ekiagera Nyasae nigo amouterete omoika Oye Omotomwa Paulo eriinde aere enywoomo buna omogweekano bw'oboamate bwa Kristo akari Oye, engeencho yaaye, Ekanisa (Ef. 5: 22-23).

Ninki Gekogera ere Okomocha ase Babere (Omomura n'Omoiseke Omosaa) Komenya amo Bataranywoomana?

Nigo egoteebekana 'ng'a, nogokora ase babere abwo bakomenya amo buna omosaacha n'omokuungu bataranywoomana. Riing'ana ria Nyasae nigo rire maiso marore: "Korwa bo[o]no timoge[e]nda buna aba[a]nto b'Ebisaku bakoge[e]nda ase ebireengererio biabo bitari nenge[e]ncho. Obong'aini bwa[a]bo bwabeekirwe omosu[u]nte, baruusananiigwe korwa ase obogima bwa Nyasae ekiagera ase ogotamanya koria kore

ime asebare ase enge[e]ncho y'obokong'u bwe chi[i]nkoro chiabo. . . Chi[i]nkoro chiabo chiabeire n[']amaga[a]ndi, bebeekire ase chinge[e]ncho chi[i]mbe chi'omobere banya[a]re gokora kera enge[e]ncho y'eubi ase obwe[e]gimeria" (Ef. 4: 1719). Engaki gete Omonene oito Yeso Kristo akamokoonya omokuungu omenyete n'omoonto oyio otare[e]nge omosaacha oye eriinde kwoorokia 'ng'a ekio are gokora nigo kiarenge okomocha (Yohana 4: 16-18).

Abakristo Abaluteeri nigo begeneete 'ng'a ogochiika kwa Gataano na Rimo, "To[o]tomana," engeencho yaaye neria 'ng'a, "Netogweenerete komoiroka na komwaancha Nyasae, eriinde tobe n'obogima obochenu na ase amang'ana n'ase ebikoro, kera oyoomo amwaanche na komosika mokaaye gose omosaacha oye" (Ekatekisimo Enke ya Luther, CPH: 1986, ekaratasi ya 10).

Onsi aya nenchera ende y'okoyakwaana ayio kera omoonto amanyete: Abaiseke n'abamura tibagweenereti komenya aamo buna omoonto na mokaaye, otatiga ekeene bare omoonto na mokaaye. Eri nigo rire eri'ekeene ase abwo bare n'emiaka emeroongo etaano n'etato (80) buna koreng'aana ere ase abwo bare n'emiaka ikomi n'etaano netato (18).

Ninki Gekogera Ekanisa Egweechandera ayio Abaanto Abagima Babere (Omomura n'Omoiseke Omosaa) Baancheranire Gokora?

Ekanisa nigo ekobechaandera ekiagera Nyasae akobeechandera. Riing'ana ri'Omonene nigo rire maiso marore igoro y'ekiina gi'okomanyana kemobere isiko y'enywoomo. Sooma chiincherere chikobwaatia:

"Timong'aineka; abanyaka tibakoira omwa[a]ndo bw'oboruoti bwa Nyasae. . ." (1 Kor. 6:9-10). "Kore[e]nde obotomani na eubi yo[o]nsi, gose obwe[e]gimeria, tibiatorwa ase egati yaino no[o]nya [']ng'ake, buna egwe[e]nerete abachenu" (Ef. 5:3).

"Ogokora gwe chinge[e]ncho chi'ebibe ni[i]go kore maiso marore na korokwo n[']obotomani, eubi, obonyaka . . . Nabaku[u]reire buna nare[e]nge kobaku[u]rera ritaang'ani, ng'a abwo

Igoro ya 'Ng'anaki...Okomenya Amo Motaranywoomana?

bagokora amang'ana anga buna ayio, tibakonyo[o]ra omwa[a]ndo bw'oboruoti bwa Nyasae" (Gal. 5:19-21).

Ninki Gekogera Okomenya Aamo kore Obokong'u Obonene?

[Okomenya amo motaranywoomana nigo kore obokong'u obonene] ekiagera Riing'ana ria Nyasae nigo rigotwoorokia maiso marore 'ng'a nigo ere ekebe ase abaanto babere komenya amo baratanywoomana. Abaanto abwo bakoamereria chingeencho echio Nyasae akaanire naende akogaambia buna ebibe nigo bagochoora enchera eyio eranyaare kobaira ase egesusuro gia kare na kare. Riing'ana ria Nyasae nigo rire maiso marore: "[']Naki onye togokora ebibe moeneno nyuma gatwaikire komanya ekeene, keng'wa[a]nso ke[e]nde tikeri ase enge[e]ncho y'ebibe" (Ibir. 10:26).

Naende, nigo togosooma 'ng'a: "[']Naki oko nakwo ogwa[a]ncha kwa Nyasae, [']ng'a mobe abachenu, na mweatanane korwa ase obotomani. Kera oyo[o]mo oino amanye buna akoga[a]mbera omobere oye omonyene ase obochenu n[']ogosika, tari ase okogania okobe buna aba[a]nto b'Ebisaku abatamomanyeti Nyasae. . . Omonene ne[e]re okoru[u]sia egesiomba ase aya onsi, buna twa[a]bamanyetie ritaang'ani na kobaku[u]rera bokong'u. [']Naki Nyasae tatoraangereti tobe ase ogotacheneka, kore[e]nde ase obochenu" (1 Tes. 4:3-7).

Inee, Ekanisa teri Enacheri Ekiina?

Ekanisa nigo ekoraria ekeene kie Riing'ana ria Nyasae. Ase okoira riibaga ria Kristo n'abaanto Baaye, abariisia nigo bare n'ookobua kobakwaanera maiso marore babere abwo bamenyete aamo [bataranywoomana] na kobaraandera Riing'ana ria Nyasae, nakwo ogoteeba, Richiiko amo n'Enchiiri. Teri aorooro ase omoriisia, gose ase omosaangererekano kobaimokeria egetaambokero babere abwo bamenyete aamo bataranywoomana. Nigo ere buya kegima ase abariisia n'emesaangererekano koimokeria egetaambokero chingeencho echio keboriisia naende ase obwegeenwa, ase enchera y'ogweechandera. Abwo babere, abaibori

baabo, nigo bagoteemwa goteeba, "Aseigo? Kera omoonto nigo agokora boigo; naende tari erio rioka, nigo tomenyete chiingaki ching'ao." Ase okoraandia ekeene kie Riing'ana ria Nyasae igoro y'echingeencho echi, Ekanisa nigo ere enyegeenwa teri enacheri ekiina.

Inee, Tebagweenereti Babere (Omomura n'Omoiseke Omosaae) Komenyana gose Goteema Korooro gose Nebagweeneri Komenyana?

Okorigarigia gw'eense kwoorokirie 'ng'a omoerio bw'okomenya aamo motaranywoomana noboamate botari naboroso naende botari oboikeranu goetania boria bw'enywoomo. Komeenta n'ayio, babere abwo bamenyete aamo nigo bare neriibaga riinene kegima ri'ogotigana ekero omoerio oye banywoomanire. Okomenya aamo [motaranywoomana] nengeencho embe, noonya 'nkorwa ase oborori bw'ekemwanyabaanto.

Obotuki obomo nigo bogoteeba iga: "Riibaga riogotigana ria baria bamenyete aamo bataranywoomana nigo rire riinene kegima kobua riria ri'abatamenyete aamo; omwaatananeko ore ase amariiko nigo ore gati ya 50% goika 100% goetania (The Relationship Between Cohabitation and Divorce," 1992, Demography, 29:357374). Obotuki bw'obosoomi bwaakoretwe ase Eyunibasiti ya Yale n'eria ya Columbia nigo bokwoorokia 'ng'a, "Ase oboamo, ekereengo ki'ogotigwa kw'abakuungu bamenyete na baria bakageire gochia koba abasaacha baabo b'amatuko are bosio nigo kere aang'e 80% goetania keria kia baria batari gotigwa" (Commitment and the Modern Union," American Sociological Review, 1988, 53:127-138).

'Ngetaambokero ki Ekanisa Ekoimokeria Chingeencho Echi?

Ekanisa, amo n'abariisia baaye, nigo bakobamanyia babere abwo bamenyete aamo bataranywoomana 'ng'a ekio bagokora nigo kere ebibe. Chinkwaana echi nigo chikoruegwa ase obwaanachani, koreende ase obwegeenwa bwe Riing'ana ria Nyasae. Chingeencho echi tichikonyaara kwaangwa gose koombigwa. Nabo eranyaare

Igoro ya 'Ng'anaki...Okomenya Amo Motaranywoomana?

kobetereria kobabeeka babere abwo bamenyete aamo bataranywoomana inse y'egesuro gi'ekanisa eriinde kobakoonya bamanye obobe bwe chingeencho echi.

Egetaambokero buna eke nabo keranyaare kogeechia abaanto. Nabo baranyaare kogeechigwa n'ekanisa, gose n'omoriisia bw'ekanisa. Chiingaki chiinde, eamate engima nabo egoonchoranwa ekeru, omoerio oye, chingeencho baangire chikoimokerigwa egetaambokero. Riing'ana ria Nyasae 'ndire n'enchera y'ogoetera amang'ana oonsi na koorokia ogokora ebibe gwaito. Eyio nemeremo ye Richiiko ria Nyasae, erio rigotwoorokia ebibe biaito.

Ekeene, ekereenga gi'ekanisa tikeri okobageechia abaanto, gose teri okogania gw'ekanisa rioka igo kobakora abaanto bamanye ebibe biabo. Ekanisa nigo etagete abaanto babirore ebibe biabo, eriinde banyaare komorora Omotooria obo. Okoyeraria Enchiiri nakio kere ekereenga ki'eritaang'ani ekenene kegima gi'ekanisa. Ekanisa nigo ekoraria Richiiko ria Nyasae eriinde abaanto banyaare koigwa na kwegeena amang'ana amaya 'ng'a, "Amanyi[i]nga a Yeso, Omwa[a]na Oye, nigo agotosibia ebibe biaito bionsi" (1 Yoh. 1:7). Ekanisa nigo etagete abaanto baigwe na koyiegeena Enchiiri, ekiagera nero yooka ebwaate chiinguru chi'ogoonchora obogima amo n'echingeencho ase engeencho y'obuya.

Inee, Inaki Babere (Omomura n'Omoiseke Omosaae) abwo Bamenyete Aamo Baranyaare Gochikoora Chingeencho Echi?

Babere bamenyete aamo bataranywoomana 'mbagweenerete koimokia ebitaambokero ebikong'u gokoora chingeencho echi. Nabo baranyaare gochoora gotigana, batabwaati merooberio ende yoonsi y'enywoomo.

Nabo baranyaare gochoora gwaatananekana baseemeretie konywoomana ase obwaango. Nigo ere buya kegima, konyoora ogosemigwa igoro y'enywoomo bataranywoomana, naboigo nyuma y'okonywoomana kwaabo. Babere baande nabo baranyaare gochoora konywoomana bosio bw'omoteneneri

bw'ekegaambo. Ase ekanisa, eye nenywoomo yancheire kegima. Babere abwo barayechoore enchera eye nigo bakobeekwa omokia eriinde enywoomo yao emanyekane ase abaanto b'ekanisa boigo. 'Nchera ende yoonsi barachoore, 'mbaganetie obosemia bw'omoriisia obo.

Inee, Enchera y'Omoerio y'Obokong'u obo Neereri?

Chiinchera nechinyiinge toranyaare koorokia. Chiamate chi'Egekristo 'nchigweenerete komanya erire riigiya n'erire riibe. Korwa oboke, nebagweenerete abaibori babateebererie abaana baabo igoro y'okomoseemeria Nyasae igoro y'enywoomo.

Abariisia amo n'emesangererekano neeganetie kobechaandera babere abwo benyoorire ase ebibe ebi ase oboremereria n'obwaanani. Emesaangererekano y'Egekristo yechaandete negweenerete gosaba 'ng'a Omoika Omochenu naakore emeremo ime y'echiinkoro n'oobogima bwa abwo bamenyete ase chingeencho chiobogima buna obo eriinde banyaare gosaria okwaanga kwaabo kwe Riing'ana ria Nyasae. Nebetereretie emesaangererekano y'Egekristo gotaombia obokong'u obo, koreende nebetereretie boigo koboimokeria egetaambokero ase obwegeenwa. Emesaangererekano negweenerete korikwaana riing'ana eri.

Babere abwo baarorire ebibe biabo nebagweenerete koigwa Riing'ana ri'okoremia ri'eira ya Nyasae: "Gatorabiorokie ebibe biaito, ere nomwege[e]nwa na omonyene oboro[o]nge, natwa[a]bere ebibe biaito, na atosibie korwa ase ogotaba boro[o]nge gwo[o]nsi" (1 Yoh. 1:9). Baise gochoora konywoomana, nebagweenerete gokora boigo ase ogoseemeria kw'omogooko ase okwaaberwa kwa Nyasae n'ogosesenigwa Kwaaye ase enywoomo yaabo.

Omonyagitaari A. L. Barry

Omotaang'ani

Ekanisa y'Ekeluteeri y'Esinooti ya Missouri